

目410

564.2

部-14

昭德先生郡齋讀書後志第四卷

子類

伊川孟子解十四卷

右皇朝程頤正叔撰頤居洛陽其門人號之為伊川先生云

百家孟子解十二卷

右集古今諸儒自裴日休至強至賈侗百餘家解孟子成一編

王安石解孟子十四卷王雱解孟子十四卷

許允成解孟子十四卷

書齋讀書後志卷三

右皇朝王安石介甫素喜孟子自爲之解其子雱與其門人許允成皆有注釋崇觀間場屋舉子宗之

點注孟子十四卷

右皇朝熙寧中蜀州張簡點節經注附以釋文以教童子

董子一卷

右周董無心撰皇朝吳秘注無心在戰國時著書闢墨子

說玄一卷

右唐王涯廣津撰涯始以貞元丙子終於元和己丑二十六年間注太玄爲六卷今不之見獨此書行于世凡五篇一明宗二立例三揲法四占法五辨首

宋惟幹太玄解十卷

右皇朝宋惟幹注惟幹嘗得太玄古本于昭應咸平中知滑臺取宋衷陸績范望三家訓解別爲之注仍作太玄宗旨兩篇附于後其學蓋師濟東田告司馬溫公所謂小宋者也

陳漸演玄十卷

右皇朝陳漸撰漸堯佐族子也國史有傳凡十四篇漸謂史以揚雄非聖人而作經猶吳楚僭王今按法

言解嘲止云太玄然則經非其自稱弟子侯芭之徒  
尊之耳

太玄淵旨一卷

右皇朝張揆撰

溫公集注太玄經十卷

右皇朝司馬光君實集漢宋衷解詁吳陸績釋文晉  
范望解贊唐王涯注經及首測宋惟幹通注陳漸演  
玄吳秘音義七家爲此書自慶曆至元豐凡三十年  
始成其直云宋者衷也小宋者惟幹也惟幹漸秘皆  
國朝人

溫公集注法言十三卷

右皇朝司馬光君實集晉李軌唐柳宗元國朝宋咸  
吳秘注光自言少好此書歷年已多今輒采諸家所  
長附以己意名曰集注凡觀書者當先正其文辨其  
音然後可以求其義故宋相公庠家有李祠部注本  
及音義最爲精詳宋吳亦據李本而其文多異同今  
叅以漢書取其通者以爲定本先審其音乃解其義  
云

元經十卷

右隋王通撰唐薛收傳皇朝阮逸學起晉惠帝太熙

元年終于陳亡予從兄子逸仕安康嘗得其本歸而示四父四父讀至帝問哇嗚哂其陋曰六籍奴婢之言不爲過按崇文無其目疑逸依託爲之

帝範一卷

右唐太宗撰凡十二篇今存者六篇貞觀末著此書以賜高宗且曰修身治國備在其中一旦不諱更無所言矣其末頗以汰侈自咎以戒高宗俾勿效已殊不知閨門之內慙德甚多豈特汰侈而已哉武后之立實有自來不能身教多言奚益悲夫

臣範二卷

右唐則天皇后武氏撰範或作軌武氏稱制時嘗詔天下學者習之尋廢本十篇今闕其下五篇

法語二十卷

右南唐劉鸚撰鸚甲戌歲擢南唐進士第實開寶七年也著書凡八十一篇言治國立身之道徐鉉爲之序

老子畧論一卷

右魏王弼撰凡十有八章景迂云弼有得於老子而無得於易注易資於老子而老子論無資於易則其淺深之効可見矣

溫公道德論述要兩卷

右皇朝司馬光撰光意謂道德連體不可偏舉故廢道經德經之名而曰道德論纂誌載其目無名天地之始有名萬物之母常無欲以觀其妙常有欲以觀其微皆於無與有下斷句不與先儒同

呂氏老子注二卷

右皇朝呂大臨撰其意以老氏之學合有無謂之玄以爲道之所由出蓋至于命矣其言道體非獨智之見孰能臻此求之終篇膠于聖人者蓋寡但不當以聖知仁義爲可絕棄耳

默希子注文子十二卷

右默希子者唐徐靈府自號也靈府謂文子周平王時人

朱玄注文子十二卷

右唐朱玄注闕符言一篇或取默希注補焉

文如海莊子疏十卷

右唐文如海撰如海明皇時道士也以郭象注放乎自然而絕學習失莊生之旨因再爲之解凡九萬餘言

呂吉甫注莊子十卷

右皇朝呂惠卿撰吉甫惠卿字也元豐七年先表進  
內篇餘續成之

王元澤注莊子十卷

右皇朝王雱撰元澤其字也

東坡廣成子解一卷

右皇朝蘇軾撰軾取莊子中黃帝問道於廣成子一  
章爲之解景迂嘗難之其序畧曰某晚玷先生薦賢  
中安敢與先生異論然先生許我不苟同翰墨具在  
天機子一卷

右不著撰人凡二十五篇或曰一名陰符二十四機

諸葛亮撰予觀其詞旨殆李筌所爲爾託之孔明也  
載道藏中

無能子三卷

右不著撰人唐光啟三年天子在褒寓三輔景氏舍  
成書二十篇述老莊自然之旨總目錄之於道家

四子治國樞四卷

右唐范乾九集四子謂莊子文子列子亢倉子其意  
以爲黃老之道內足以修身外足以治國周王得文  
子之言趙王納莊周之論皆能興邦致治故採其書  
有益治道者分爲二十門

風俗通義十卷

右漢應劭撰劭字仲遠奉之子篤學博覽多聞靈帝時舉孝廉仕至泰山太守撰風俗通以辨物名號釋時俗嫌疑文雖不典世服其洽聞

意林三卷

右唐馬總會元撰初梁穎川庾仲容取諸家書術數雜說凡一百七家抄其要語爲三十卷總以其繁畧失中增損成三軸前有戴叔倫楊伯存兩序

格言五卷

右僞唐韓熙載叔言撰熙載以經濟自任乃著書二十六篇論古今王霸之道以于李煜首言陽九百六之數及五運迭興事其驕雜如此有門生舒雅序

兩同書兩卷

右唐羅隱撰隱謂老子養生孔子訓世因本之著內外篇各五其曰兩同書者取兩者同出而異名之言也

物類相感志十卷

右皇朝僧贊寧撰采經籍傳記物類相感者志之分天地人物四門贊寧吳人以博物稱于世柳如京徐騎省與之遊或就質疑事楊文公歐陽文忠公亦皆

知其名

王氏雜說十卷

右皇朝王安石介甫撰蔡京爲安石傳其畧曰自先王澤竭國異家殊由漢迄唐源流浸深宋興文物盛矣然不知道德性命之理安石奮乎百世之下追堯舜三代通乎晝夜陰陽所不能測而人於神初著雜說數萬言世謂其言與孟軻相上下於是天下之士始原道德之意窺性命之端云所謂雜說卽此書也以京之誇至如此且不知所謂通乎晝夜陰陽所不能測而入於神者爲何等語故著之

保生月錄一卷

右唐韋行規撰分十二月雜纂每月攝養種藝祈禳之術也李翱爲之序

輦下歲時記一卷

右唐李綽撰綽經黃巢之亂避地蠻隅偶記秦地盛事傳諸晚學云

國朝時令十二卷

右皇朝賈昌朝撰景祐初復禮記舊文其唐月令別行三年詔昌朝與丁度李淑采國朝律曆典禮百度昏曉中星祠祀配侑歲時施行約唐月令定爲時令

一卷以備宣讀後昌朝注爲十二卷奏上頒行

顧渚山記二卷

右唐陸羽撰羽與皎然朱放輩論茶以顧渚爲第一  
顧渚山在湖州吳王夫差顧望欲以爲都故以名山

呂惠卿建安茶記

右皇朝呂惠卿撰

聖宋茶論一卷

右徽宗御製

茶雜文一卷

右集古今詩文及茶者

竹譜一卷

右戴凱之撰凱之字慶預武昌人哀輯竹事四字一  
讀有韻類賦頌李邯鄲云未詳何代人

筍譜二卷

右皇朝僧惠崇撰

小說類

殷芸小說十卷

右宋殷芸撰述秦漢以來雜事予家本題曰劉餗李  
淑以爲非

玄怪錄十卷

右唐牛僧孺撰僧孺爲宰相有聞於世而著此等書  
周秦行紀之謗蓋有以致之也

周秦行紀一卷

右唐牛僧孺自敘所遇異事賈黃中以爲韋瓘所撰  
瓘李德裕門人以此誣僧孺

鹿革事類三十卷鹿革文類三十卷

右節太平廣記事實成一編曰事類詩文成一編曰  
文類蔡蕃晉如所撰晉如博學通音律能屬文與十  
父相友善

鑒戒錄十卷

右後蜀何光遠撰字輝夫東海人唐證中纂輯唐以  
來君臣事迹可爲世鑒者前有劉曦度序李獻臣云  
不知何時人考之不詳也

歸田錄六卷

右皇朝李旼撰旼蜀人張詠客也與范鎮友善熙寧  
中致仕歸與門人賓客燕談袞袞忘倦門人請編錄  
之遂以該聞爲目又有雜詩十二篇係于後

開譚錄兩卷

右皇朝蘇耆撰舜卿之父也記五代以來雜事下帙  
多載馮道行義

古今前定錄二卷

右皇朝尹國均輯經史子集古今之人興衰窮達貴賤貧富死生壽夭與夫一動靜一語默一飲一啄定于前而形于夢兆于卜見于相貌應于讖記者凡一門以爲不知命而躁競者之戒至若裴度以陰德而致貴孫亮以陰譴而減齡之類又別爲二門使君子不以天廢人云

傅公嘉話一卷

右皇朝傅堯俞之子孫記堯俞之言行凡四十餘章獻簡堯俞諡也

曾公南遊記一卷

右曾公未詳何人當是公亮之孫也共十二章記國朝雜事

搢紳脞說二十卷

右皇朝張唐英君房撰君房博學通釋老善著書如名臣傳蜀檣机雲笈七籤行于世者毋慮數百卷此書亦詳實

青箱雜記

右皇朝<sup>宋</sup>處厚撰處厚發蔡確車蓋亭詩所記多失實成都置交子務起於寇瑊處厚乃以爲張詠他多

類此

綱素雜記十卷

右皇朝黃朝英撰所記二百事朝英建州人紹聖後舉子也爲王安石之學者以贈之以芍藥爲男淫女貽我握椒爲女淫男前輩嘗以是爲嗤朝英獨愛重之他可知也

褒善錄一卷

右皇朝王蕃撰嘉祐中巴縣簿黃靖國死而復蘇道其冥中所見廖生嘗傳之蕃刪取其要爲此書

麗情集二十卷

右皇朝張君房唐英編古今情感事

天文曆算類

景祐乾象新書三卷

右崇文目有三十卷置之天文類

曆法一卷

右未詳撰人曆草也

刻漏圖一卷

右皇朝燕肅撰肅有巧思上蓮花漏法嘗知潼川有石刻存焉洛陽宋君者增損肅之法爲此圖

五行類

廣古今五行志三十卷

右竇鏊撰唐志有其目未詳何人纂五行變異敘其徵應蓋爲洪範之學者自古術數之學多矣言五行則本洪範言卜筮則本周易近時兩者之學殆絕而最盛于世者葬書相術五星祿命六壬遁甲星禽而已然六壬之類足以推一時之吉凶星禽五星祿命相術之類足以推一身之吉凶葬書之類足以推一家之吉凶遁甲之類足以推一國之吉凶其所知若有遠近之異而或中或否不可盡信則一也且其說皆本於五行故同次之爲一類

青囊補注三卷

右晉郭璞撰世傳葬書之學皆云無出郭璞之右者今盛行多璞書也按璞傳載葬母事世傳蓋不誣矣璞未幾爲王敦所殺若謂禍福皆係於葬則璞不應擇凶地以取禍若謂禍福有定數或它有以致之則葬地不必擇矣嗚呼璞自用其術尚如此况後遵其遺書者乎

撥沙經一卷

右唐呂才撰地理書畫山水之形成圖蓋依託者

會元經二十四卷

右孫季邕撰未詳何代人集諸家相地書芟其鄙陋無驗者成是書

五音地理新書三十卷

右唐僧一行撰以人姓五音驗八山二十八將吉凶之方其學今世不行

秤星經三卷

右不著撰人以日月五星羅喉計都紫炁月孛十一曜演十二宮宿度以推人貴賤壽夭休咎不知其術之所起或云天竺梵學也按洪範曰歲月日時無易百穀用成又用明俊民用章家用平康月之從星則

以風雨冷州鳩曰武王伐殷歲在鶉火月在天駟一曰在析木之津辰在斗柄星在天黿以此言之五星之術其來尚矣蓋可以占國則可以占事可以占事則可以占人也然術家用日月五星以占吉凶又加以交初交中之神紫炁月孛之宿初中者交食之會亦可以意求惟氣孛無稽而術家獨以爲效且曰土木之餘氣五星之行土木最遲而爲吉凶者久故有餘氣云

周易十二論一卷

右未詳撰人論日月五星直年以占吉凶

琅珠子疏五卷

右皇朝李全東方明撰

河圖天地二運賦一卷

右不著撰人論天地二運蓋三命書也崇文目以爲卜筮類

常陽經一卷

右崇文目題曰黃帝式用蓋六壬占卜術也

六壬要訣一卷

右未詳何人撰隋志載六壬之書兩種金鑿密記及五代史記頗言其驗今世龜筮道息而此術獨行

六壬課鈴一卷

右未詳何人所纂以六十甲子加十二時成七百二十課三傳入神以占吉凶

玉關歌一卷

右不題撰人六壬課訣也

二十二家相書三卷

右或集許負以下三十二家書成此編

月波洞中記一卷

右序稱唐任道遙得之於太白山月波洞石壁上凡九篇相形術也崇文目置之五行類

靈龜經一卷

右史蘇撰論龜兆之吉凶崇文目二卷

遁甲萬一訣一卷

右題云唐李靖所纂黃帝書按遁甲之書見於隋志凡一十三家則其學之來亦不在近世矣以休生傷杜景死驚開八門推國家之吉凶通其學者以爲有驗未之嘗試也

遁甲經一卷

右唐胡乾撰李氏書目亦云九天玄女術推九星八門三奇六儀之法

鮮鵲經十卷

右未詳撰人凡十門六十二章以星禽推知人之吉凶言其性情嗜好爲九驗說者謂本神仙之訣也故此書載于道藏李邕鄆云羅浮山逍遙子撰

八神筮法二卷

右以八卦世分六十四卦每卦首必云子夏曰論易筮之吉凶

靈樞經二卷

右漢東方朔撰又云張良劉安未知孰是晉顏幼明宋何承天注有唐李遠敘歸來子以爲黃石公書豈

謂以授長者邪按南史載客從南來遺我良財寶貨珠璣金碗玉盃之繇則古之遺書也明矣凡一百二十卦皆有繇辭

紫堂訣三卷

右紫堂先生撰未詳何代人著紫垣十二星至隱曜總三百六十位分二十八舍附之以五星配十二辰以推人命之吉凶

兵類

郭元振安邊策三卷

右唐郭元振撰以總兵進攻聚眾退守不可無權謀乃著此書故舊題曰定遠安邊策

武經聖畧十五卷

右皇朝王洙撰寶元中西邊用兵朝廷講武備是時洙奉詔編祖宗任將用兵邊防事迹分十二門

武經總要四十卷

右皇朝曾公亮丁度撰康定中朝廷恐羣帥昧古今之學命公亮等采古兵法及本朝計謀方畧凡五年奏御制度五卷邊防五卷故事十五卷占候五卷御爲製序

兵要望江南一卷

右題云黃石公以授張良者按其書雜占行軍吉凶  
寓聲于望江南詞取其易記憶總目云武安軍左押  
衙易靜撰蓋唐人也

倚馬立成法二卷

右唐李淳風撰兵行占候之書也淳風太宗時人而  
此書起九宮法至貞元六年庚午假托以行其書爾  
非淳風本旨也

類書類

古人姓氏相同錄一卷

右唐王光庭撰光庭中進士第

北堂書抄一百七十三卷

右唐虞世南撰世南仕隋爲秘書郎時鈔經史百家  
之事以備用分八十部八百一類北堂者省之後堂  
世南鈔書之所也家一百二十卷

集類一百卷

右唐劉綺莊撰綺莊毗陵人嘗爲蘇州崑山縣令家  
多異書採摭事類分二十餘門凡五十餘萬言上之  
于朝前有萬希序題云開元二十九年辛巳按綺莊  
集有上白敏中啟疑非玄宗時人當攷

三教珠英三卷

右唐張昌宗等撰按唐志一千二百卷今所存者止此

備舉文言二十卷

右唐陸贄撰總四百五十餘門議者謂大類六帖而文辭過焉崇文總目中有之

小名錄三卷

右唐陸龜蒙撰龜蒙以末世有官名小名之別自秦至隋編而紀之至於神仙玉女之名婦人臧獲之字亦無棄焉龜蒙世稱其博然此書特雜取於史傳間爾無異聞也

備忘小抄十卷

右偽蜀文谷撰雜抄子史一千餘事以備遺忘其後題廣政三年廣政王衍號也

唐會要一百卷

右皇朝王溥撰初唐蘇冕敘高祖至德宗九朝沿革損益之制大中七年詔崔鉉等撰次德宗以來事至宣宗大中六年以續冕書溥又采宣宗以後事共成百卷建隆二年正月奏御詞簡禮備太祖覽而嘉之詔藏於史閣賜物有差

冊府元龜一千卷

右皇朝景德二年詔王欽若楊億修君臣事迹唯取六經子史不錄小說雜書至祥符六年書成上之凡三十一部有總序千一百四門有小序同修者十五人錢惟演杜鎬刁衍李維咸綸王希哲陳彭年姜興宋貽陳越陳從易劉筠查道王曙夏竦初撰篇序諸儒皆作帝以體製不一遂擇李維錢惟演陳彭年劉筠夏竦等付楊億竄定賜今名爲序冠其首其音釋又命孫奭爲之

類要六十五卷

右皇朝晏殊纂分門輯經史子集事實以備修文之

用

禁殺錄一卷

右皇朝李象先纂元祐中象先集錄古今冥報事以爲殺戒

貨泉錄一卷

右皇朝陶岳撰記五代諸侯擅改錢幣之由幽州嶺南福建湖南江南五國

墨譜一卷

右皇朝董秉煥熙寧間人秉惠世人徒知祖李之名而不知形模之異同製作之精斲故作圖以著其源

流用補蘇易簡之闕文云

印格一卷

右皇朝晁克一撰克一張文潛甥也文潛嘗爲之序其畧曰克一旣好古印章其父補之愛之尤篤悉錄古今印璽之法謂之圖書譜自秦以來變制異狀皆能言其故余頗愛其用心不移致精于末務使有傳焉

蒙求三卷

右唐李瀚撰纂經傳善惡事實類者兩兩相比爲韻語取蒙卦童蒙求我之義名其書蓋以教學童云

魯史分門屬類賦三卷

右皇朝楊筠撰以左氏事類分十門各爲律賦一篇乾德四年奏御詔褒之

仙苑編珠二卷

右唐王松年撰取阮倉劉向葛洪所傳神仙又取經記中梁以後神仙百二十八人比事屬辭効蒙求本體爲是書

國史對韻十二卷

右皇朝范鎮撰吳仲庶嘗稱景仁憫諸後學雖涉書傳而問之今代典故則懵然不知乃自太祖開基迄

于仁宗朝擴取事實可爲規矩鑒戒者用韻編次之  
卽此書也

孝悌類鑒七卷

右皇朝俞觀能撰取經史孝悌事成四言韻語

兩漢蒙求五卷唐史屬辭五卷南北史蒙求

十卷

右未詳撰人皆効李瀚也

雜藝術類

名畫見聞志六卷

右皇朝郭若虛撰若虛以張愛賓之畫絕筆永昌元

年因續之歷五代止國朝熙寧七年分敘論紀藝故

事近事四門

溫公投壺新格一卷

右皇朝司馬光君實撰舊有投壺格君實惡其多取

奇中者以爲僥倖因盡改之

九章算經九卷

右未詳撰人者姓名或曰周公九章者一方田二算

粟三衰分四少廣五商功六均輸七盈不足八方程

九句股魏劉徽唐李淳風嘗爲之注則此術起于漢

之前矣

求一算經一卷

右未詳撰人

溫公七國象碁一卷

右皇朝司馬光君實撰周秦韓魏趙楚齊燕實八國而云七者周室不與焉

葉子戲格一卷

右不著撰人世傳葉子婦人也撰此戲晚唐之時也

相鶴經一卷

右題曰浮丘公撰其傳云浮丘公授于王子晉後崔文子學道于子晉得其文藏于嵩山之石室淮南公

採藥得之乃傳于世

相馬經二卷

右伯樂撰

相馬經一卷

右未詳撰人述相馬法式并著馬之疾狀及治療之術李氏書目有之

皇帝醫相馬經二卷

右唐穆彞集伯樂王良等六家書成此編皇帝斥神農也

育駿方三卷

右未詳撰人相馬術及醫治畜牧之方

相牛經一卷

右序曰竊咸傳之百里奚漢世河西薛公得其書以相牛千百不失其一至魏世高堂生又傳晉宣帝其後秘之細字薛公注也

醫家類

靈樞經九卷

右王冰謂此書卽漢志皇帝內經十八卷之九也或謂好事者于皇甫謐所集內經倉公論中抄出之名爲古書也未知孰是

丁德用注難經五卷

右皇朝丁德用注以楊玄操所瀆甚失大義因改正之經文隱奧者繪爲圖德用濟陽人嘉祐末其書始成

虞庶注難經五卷

右皇朝虞庶注庶仁壽人寓居澹嘉少爲儒已而棄其業習醫術爲此書以補呂楊所未盡黎泰辰治平間爲之序

金匱玉函經八卷

右漢張仲景撰晉王叔和集設答問雜病形證脈理

叅以療治之方仁宗朝王洙得于館中用之甚効合二百六十二方

仲景傷寒論十卷

右漢張仲景述晉王叔和撰次按名醫錄云仲景南陽人名機仲景其字也舉孝廉官至長沙太守以宗族二百餘口建安紀年以來未及十稔死者三之二而傷寒居其七乃著論二十二篇證外合二百九十七法一百一十二方善醫者或云仲景著傷寒論誠不刊之典然有大人之病而無嬰孺之患有北方之藥而無南方之治此其所闕者蓋陳蔡以南不可用

柴胡白虎二湯治傷寒其言極有理

脉經三卷

右題云黃帝撰論診脉之要凡二十一篇

脉訣一卷

右題曰王叔和皆歌訣鄙淺之言後人依託者然最行于世

雷公炮炙三卷

右宋雷斅撰胡洽重定述百藥性味炮熬煮炙之方其論多本之于乾寧晏先生斅稱內究守國安正公當是官名未詳

金寶鑑三卷

右魏嵩撰嵩仕至翰林博士崇文總目云不詳何代人述脉候徵驗要妙之理

通真子傷寒訣一卷

右題曰通真子而不著名氏用張長沙傷寒論爲歌詩以便覽者脉訣之類也

傷寒百問三卷

右題曰無求子大觀初所著書

運氣論奧三卷

右皇朝劉溫舒撰溫舒以素問氣運最爲治病之要

而答問紛揉文辭古奧讀者難知因爲三十論七十二圖上于朝

脉粹一卷

右皇朝蕭世基撰世基嘗閱素問及歷代醫經患其難知因綴緝成一編治平中姚誼序之

存真圖一卷

右皇朝楊介編崇寧間泗州刑賊於市郡守李夷行遣醫并畫工往親決膜摘膏盲曲折圖之盡得纖悉介校以古書無少異者比歐希範五藏圖過之遠矣實有益醫家也王莽時捕得翟義黨王孫慶使太醫

尚方與巧屠共剝剝之量度五藏以竹筵導其脉知所終始云可以治病亦是此意

證類本草三十二卷

右皇朝唐慎微纂合兩本草爲一書且集書傳所記單方附之于本條之下殊爲詳博

子午經一卷

右題云扁鵲撰論鍼砭之要成歌詠蓋後人依託者明堂針灸圖二卷

右題曰黃帝論人身俞穴及灼灸禁忌

點烙三十六黃經一卷

右不著撰人唐世書也國史補云自茗飲行于世人不復病黃痺

千金方三十卷

右唐孫思邈撰思邈博通經傳洞明醫術著用藥之方脉之訣針灸之穴禁架之法以至導引養生之要無不周悉後世或能窺其一二未有不爲名醫者然議者頗恨其獨不知傷寒之數云

千金翼方三十卷

右唐孫思邈撰思邈著千金方復掇集遺軼以羽翼其書成一家之學林億等謂首之以藥錄次之以婦

人傷寒小兒養性辟穀退居補益雜病瘡癰色脉針灸而禁經終焉者皆有指意云

龍樹眼論三卷

右佛經龍樹大士者能治眼疾或假其說集治七十二種目病之方

寶藏暢微論三卷

右五代軒轅述撰青霞君作寶藏論三篇著變煉金石之訣既詳其未善因刊其謬誤增其缺漏以成是言故曰暢微時年九十寶乾亨二年也

太平聖惠方一百卷



